

晉州鄭氏忠孝錄

三世事蹟序

菁川之鄭遜于冠山自狂奴公爲始方狂奴公匿影逃禍淪爲寒門世孰知其奕葉鍾鼎與國盛衰其光上簿日月哉然而狂奴公玄孫五六君子者出或典城宰縣執金鼓走國難棄骨原野而不悔或篤行厲操所至冰玉自待見滌清白吏爲布衣者亦能遭時艱危相與從容死賊由是鄭遂爲湖南名族獨以其發跡草莽家無所受而人物之盛有若積累薰襲者然人咸異之及夫狂奴公墓誌出而冠山與菁川合烈烈忠莊

端王之相郊隱爲父狂奴爲子蟬嫣胄閥如星斗之有絡始知向所疑五六君子者其氣類血脉盖本之忠莊公蘭茝芝桂其香在根雖移種他方根根相接懷芬孕馥有不可終誣也噫天道一往一來其往也莫或挽之其來也莫或遏之忠莊之世匪忠莊之悉伊大運之有所蕩軋也狂奴公義在存祀不得不隱忍以晦家聲惟賢子獨知其心誌父墓而秘諸家人誦於時也狂奴公既葬之

二百有七十年其勃鬱冲騰旬轟感激之氣如火在砲待時將發馬氏蠢蠢觸其機也黃侯冥冥扣其鍵也泉戶一開長夜復朝白虹歸于天石文錯落於地上斯亦天下之大奇也或曰白虹何氣也羽常曰此非白虹也乃萬世綱常也子得之爲孝臣得之爲忠黎庶得之榮生而厚死聖人得之措天地於權衡之上行其輕重鬼神得之陰陽以正萬化以興其或闕而不信濇而不洩則有光有暈氣之變也其可得而錮之耶或曰今其氣散在何處羽常曰彼忠莊狂奴及五六君子者皆已大顯于世靡有闕濇其氣固洋洋自在作山河而壯本朝矣鄭君仁學菁川之良輯其屢世文獻自國乘所載以及名臣鴻儒碑狀記跋之作總六十五則詩若干篇將鏤木而廣之徵序於首陽吳羽常羽常雖固陋不敢常形其素感於中者如此時己卯十月之晦日也首陽吳羽常序